

10. marts 2026

UPA 2026/147

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Suliffeqarfimmik kisimiillutik ingerlatsillutik namminersorlutik inuussutissarsiuteqartut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunnit matusisinnaajunnaarsillugit Naartunermi, erninermi meeravissiartaarnermilu sulinngiffeqartarneq pillugu Inatsisartut inatsisaata allanngortinneqarnissaanut siunnersuusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Napaartoq Isak Petrussen, Demokraatit)

Tunngavilersuut

Suliffeqarfimmik kisimiillutik ingerlatsillutik namminersorlutik inuussutissarsiuteqartut meerartaarnerminnut atatillugu sulinngiffeqarnerminni Meerartaarnermut atatillugu sulinngiffeqarnermut aningaasaateqarfimmit, meerartaarnermut atatillugu sulinngiffeqarnermi ullormusianik pissarsisinnaassagunik suliffeqarfimminnik unitsitsigallarnissaat ullumikkut piumasaqaataavoq¹.

Piumasaqaat tamanna allaffissornermik, inuussutissarsiummillu ingerlatsinerup aamma meerartaarnermi sulinngiffeqarnerup ersarissumik killilerneqarnissaannik kissaateqarnermik ilaatigut tunngaveqarpoq. Aaqqineq imak aaqqinneqarnikuvoq, sulinngiffeqarnermi isertitassaraluanut meerartaarnermut atatillugu sulinngiffeqarnermi ullormusiat taarsiullugit isertitarineqassasut.

Taamaakkaluartoq Demokraatit isumaqarput, aaqqiisimanerup taassuma isumaliutigineqaqqinnissaanut piffissanngortoq. Inuiaqatigiinni nutaaliaasuni meerartaassagaanni suliffeqarfiutigineqartoq matuneqartassasoq ilumorsinnaanngilaq.

Inuiaqatigiitta ineriartortinneqarnissaanni namminersorlutik inuussutissarsiutillit, aallarnisaasullu aalajangiisumik inissisimapput. Suliffinnik, nutaaliornermik, najukkamilu siuariartortitsinermik pilersitsisarput. Suliffeqarfiit inummit ataatsimit ingerlanneqartorpaaluit mikisunnguusarput eqqorneqarsinnaasarlutillu, suliffeqarfiullu ingerlanneqarnerani piginnittoq nammineerluni tunngaviukkajuttarluni. Piffissap ilaani suliffeqarfimmik unitsitsinissamik piumasaqarneq sullitanik, isumaqatigiissutinik, niuerneramilu inissisimanermik annaasaqarnermik kinguneqarsinnaavoq.

¹ Naartunermi, erninermi meeravissiartaarnermilu sulinngiffeqartarneq pillugu Inatsisartut inatsisaanni nr. 5, 19. november 2020-meersumi § 48, imm. 1



Ajornerpaamik pisoqartillugu suliffeqarfik ataavartumik matuneqarneranik kinguneqarsinnaavoq. Inuiaqatigiittut aallarnisaasut amerlanerusut pisariaqartippagut. Ikinnerusuunngitsut.

Namminersortunut atugassarititaasunut sinaakkusiussat akissarsialinnik ajornerussappata, aallarnissaaneq aamma ilaqutariinneq ataatsimoortinneqaruminaatsut oqariartuutigissavarput. Oqariartuut tamanna kukkuvoq. Namminneq suliffeqarfiutitaarnissaminnik toqqaasimasut meerartaarnerminni aningaasatigut aarlerinartumik inissinnginnissaasa qulakkeerneqarnissaanut ileqqorissaartumik iliuuseqarnissatsinnut, politikikkullu pisussaaffeqarpugut.

Meerartaarnermut atatillugu sulinngiffeqarnermi ilaqutariit naleqquttumik pilersorneqarnissaminnut tunngavissaqarnissaat qulakkeerumallugu, meerartaarnermut atatillugu sulinngiffeqarnermut aaqqiissut pilersinneqarpoq. Kisianni namminersorlutik inuussutissarsiutillit inuunerminni pilersitaasa matoratarsinnaanerani aaqqiineq kinguneqartitsisinnaappat, arlaatigut ataqatigiittoqanngilaq.

Ilutigalugu oqaatigisassaqqippoq, suliffeqarfiit inummit ataatsimit ingerlanneqartut ukiuni kingullerni ikitsuinnaat aaqqiinermik atuisimammata². Namminersorlutik inuussutissarsiutillit meerartaarnermi sulinngiffeqarnermi ullormusiaqarsinnaatitaanerminnik atuinissaannut, piumasaqaataasut tunuarsimaartitsinerinik tamanna takussutaasinnaavoq.

Tamanna pillugu Demokraatit isumaqarput, tuliiuttunik qulakkeerisumik Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaannut allannguutissatut siunnersuummik Naalakkersuisut saqqummiussissasut:

- Namminersorlutik inuussutissarsiutillit suliffeqarfimminnik unitsitsigallarnissaannik imaluunniit matusinissaannik piumasaqaatitaqanngitsumik meerartaarnermi sulinngiffeqarnermi ullormusiaqarsinnaassasut.

- Aaqqiineq naleqquttumik, akisussaassuseqartumillu suli tunngaveqartussanngorlugu meerartaarnermi sulinngiffeqarnermi ullormusiat, matussusiisinnaanertalerlugu/ilanngaasiisinnaanertalerlugu killilimmik inuussutissarsiornermik ataqatigiissinnaanngorlugit najoqqutassamik pilersitsisoqassasoq.

Namminersorlutik inuussutissarsiutillinnut naleqqutinngitsumik iluaqutissamik pilersitsinissamut tunngassuteqanngilaq. Naleqquttumik, eqaatsumillu pilersitsinissamut tunngassuteqarpoq. Aaqqiineq suli aqunneqarsinnaassasoq, atorneqarluissamillu ammaassissanngitsoq soorunalimi qulakkiissavarput. Kisianni allaffissornermik eqqarsaatiginninnerit ullumikkumut naapertuuttumik, naapertuilluartumillu aaqqiissuteqarnissamut akimmiffiussanngillat.

Nukittuumik, najukkamilu tunngavilimmik inuussutissarsiutinik ingerlataqarnissaq politikikkut

² § 37 naapertorlugu apeqqummut normu 226-2025-mut akissut



kissaatigigutsigu, taava aamma qanoq ingerlanissaanik nalullugu namminneq suliffeqarfimmik pilersitsisunut atugassarititaasut pitsanngorsarnissaannut sapiissuseqartariaqarpugut.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

Siunnersuutip kingunerisaanik inatsisissatut siunnersuusiortoqartariaqassaaq. Tassunga atatillugu allaffissornermi aningaasartuutissat, ilinniagartuut ukiup affaanut sulinerat 250.000 koruuniusut qaangissanngikkaat naatsorsuutigineqarpoq.

Meerartaarnermut atatillugu sulinngiffeqarnermut aningaasaateqarfiup aningaasartuuteqarnerusinnaanerani najoqqutaasussaq, matumani aamma inuussutissarsiummik ilaatigut ingerlatsigaanni matussusiisinnaaneq/ilanngaasiisinnaaneq atuutsilersinneqassanersoq apeqqutaassapput. Inuussutissarsiutillit aaqqiisummik massakkut atuisut ikitsuinnaammata, tamarmiusumik aningaasatigut kingunerisinnaasai killeqassangatinneqarput.

Namminersortunut aningaasatigut allaffissornikkullu kingunerisassai

Namminersortunut, aallarnisaasunullu atugassarititaasunut sinaakkusiussanut siunnersuut pitsanngorsaataassaaq. Meerartaarnermi toqqissisimanerunermik pilersitsissaaq, siunissamilu ungasinnerusumi pilersitserusussuseqarnermut, inuussutissarsiummillu ingerlatsinermut pitsaasumik sunniuteqarsinnaalluni. Siunnersuut namminersorlutik suliffeqarfinnut allanut allaffissornikkut kingunissaqanngilaq.

Innuttaasunut aningaasatigut allaffissornikkullu kingunerisassai

Innuttaasut kisimik ingerlatsillutik suliffeqarfiutillit meerartaarnermut atatillugu sulinngiffeqarnerini eqaannerusumik, aningaasatigullu toqqissimanarnerusumik kinguneqassaaq. Siunnersuut innuttaasut sinnerinut aningaasatigut, allaffissornikkullu toqqaannartumik kingunissaqanngilaq.